


松江府志

四十二




漢書門				
二	九	二	三	五
四	一	一	三	三
冊	架	函	號	類

內閣文庫				
九	二	三	五	三
二	一	一	三	三
冊	架	函	號	類

內閣文庫		
番號	漢	2353
冊數	24	(20)
函號	292	17

二十



松江府志卷之四十二

名臣

明九十五人

淺草文庫

藏書印

徐階字子升華亭人父黼授宣平縣丞徙寧都階生五歲從父移任道墮括蒼嶺百餘丈衣絰於樹得不死二十舉應天試明年對策第三人及第嘉靖癸未科階為人短小白皙

秀眉目善容止輔臣楊廷和見而異之語其寮曰此少年

名位不下我尋授翰林院編修予歸娶充經筵展書預修

會典時上好更定禮制上嘉靖也欲絀孔子王號去像為木主

邊豆禮樂皆有所抑損而首揆張孚敬緣上指發之下儒

老江府志 卷之四十一
臣議相顧懾讐亡異同者階獨條其三不必五不可狀甚
辨疏上報聞孚敬坐朝堂召階盛氣詰之階徐理前說且
曰高帝盡革嶽瀆號而獨不革孔子者何也孚敬曰高帝
少時作何可據階曰高帝定天下而後議禮寧少邪果爾
明公之議四郊何以力據高帝少作孚敬曰爾謂塑像應
古禮不階曰塑像非古然旣已肖而事之何忍毀也孚敬
曰程氏不云乎一毫髮不似吾親可以親名之乎階曰有
一毫髮而似吾親毀諸可乎且明公能盡必列聖御容無
毫髮不似乎哉卽何以處之孚敬語塞怒曰若叛我階曰
叛者主於附者也階未嘗附公何言叛長揖出於是上亦

緣孚敬意爲或問以難階斥爲延平府推官階單車之郡
清繫囚三日獲尤溪劇盜一日二十人三載遷黃州府同知
擢浙江按察僉事提調學校進江西按察副使仍視學政
以新建伯有功江西爲祠祀之而推明其學吏部擬薦尙
寶卿國子司業太常寺少卿皆不果最後以皇太子出閣
召拜司經局洗馬擢國子祭酒禮部右侍郎尋改吏部時
年僅四十三尙書熊浹雅重階會浹以直諫去而唐龍周
用相繼代老多病階數署部事所推宋景張岳王道歐陽
德范總皆天下長者而最後周用卒當推代者刑部尙書
聞淵名爲老成人非上所急也階首推淵明年掌院事兼

會典副總裁進禮部尚書仍兼學士入直無逸殿吏部闕
尚書廷推階上曰階方侍朕左右何外擬也明年加太子
太保嚴嵩中傷階者百方時咸寧侯仇鸞方言邊事有殊
寵與階共直舍東西屋嵩益惡忌階鸞時利屬國朶顏弱
欲掩以爲功請大發兵征之下禮兵二部議階曰征之易
耳一征而永撤我百八十年之藩籬鸞自是不悅階尋進
兼文淵閣大學士叅預機務會鸞疽發背不能將警至不
肯吐大將軍印階密言其不可恃乞蚤更置將上答曰吾
非不知之欲甚彼所爲耳迺因兵部疏馳使奪其印鸞一
夕自恨死死五日而事敗妻子僇於市家盡籍嵩之始見

仇鸞敗謂階同直舍將以是媒之而會詞知自階發而奪
印中夜扶牀行咄咄曰吾長於階一紀而智何少也自是
謀稍息矣一品滿三載進勳爲柱國再進兼太子太傅武
英殿大學士滿六載兼食大學士俸再錄子爲中書舍人
加少傅九載賜兼金文幣寶鈔肥羜上尊改兼吏部尚書
宴禮部壘書褒諭有加兵部員外郎楊繼盛論嚴嵩罪狀
而中有二王皆知其奸語上怒下繼盛錦衣獄嵩謂二王
深宮何所知我奸楊庶僚何由知二王之知我奸必有交
關其間者屬陸炳加根究階戒炳卽不慎一及皇子如宗
社何又爲危語動嵩曰上僅二子萬一根究得之必不忍

以二子謝公所罪左右耳公獨奈何顯結宮邸怨也嵩懼
乃寢尋加太子太師會上所居永壽宮災徙居玉熙殿隘
甚以問嚴嵩嵩請上徙南城上不憚更問階階曰時方營
三殿有餘材其小而不中程者以當永壽則尙鉅請以責
司空雷禮可計月而就上悅如階議而命階之子尙寶丞
璠兼工部主事同閱視新宮成上卽日徙居之命曰萬壽
宮而褒階忠謀進少師兼支尙書俸予一子中書舍人子
璠亦超爲太常寺少卿而嵩日屈滿十二年考賚金綺紗
緡羊酒如九載子誥命賜宴禮部階固辭亡何而鄒御史
應龍論嵩父子罪上勒嵩致仕其子世蕃獄戍之命吏

部擢御史五品京職上雖以御史言去嵩然念其供奉久
憐之而左右入其間者從容言非嚴嵩誰爲上奉玄上忽
忽不樂手諭階及次輔袁煒欲退奉事玄傳嗣治天下令
擬詔行階等謝不敢而吏禮二部奏遷鄒應龍通政參議
得旨矣忽復奉諭責階等不擬詔而謂二部臣皆奉贊者
何一旦官此邪物階復言退而傳嗣非獨臣等不敢聞命
天下皆不敢以爲然邪物之轉二部奉旨而後行臣不敢
傳亦不敢泄不報上不欲階久直曰無以杜兒輩姦階謂
陸博走馬使酒狹邪爲姦長安中者不在外弗杜也甘言
比周相合而爲姦於朝堂則在內猶在外也上悟輟分宜

直廬以賜階中外人情大安進建極殿大學士數上疏請
增置輔臣上與階謀進尚書吏部嚴訥禮部李春芳入內
閣而起故吏部尚書郭朴於憂俟滿代訥春芳之在內閣
嚴事階上所推寄益至當考十五載滿未敢請上知之敕
吏禮二部具恩數以聞請加階特進錄一子尚寶司丞賜
璽書褒諭宴禮部給三代誥命上報曰加上柱國示特眷
階力辭益自歛畏上日益愛階當階之前天下無所不中
兵水旱沴厲乘之分閫以上一語不當立就逮大者誅戮
小者竄謫而政地復有竊顏色爲威福者數千里而外不
能探所自益惴惴唯徒橐長安中論直市六尺軀而已階

以寬大廣上意大約緹騎逮省減十九廷尉若盧無所用
深文一時稱之嚴訥旣告歸而郭朴高拱入朴得武英殿
大學士拱文淵閣大學士然事皆決於階階之始爲禮部
以至首輔十五年而請立太子者數四上春秋高意不欲
言繼嗣輒報寢時裕景二王方并重一旦景王之國上忽
下諭自謂郊廟弗躬早朝久廢且病弱弗任卦數向周宜
卷身奉道傳繼不可緩不然恐或後醜耳且令與在直諸
臣密計以對階皇恐對謂此豈可與諸臣計夫所謂後醜
者必有非常悖逆之人而又有大姦惡左右之以有此叵
測今何足疑也上又謂得無以久待爲恨乎階又力辯而

上猶以成祖之注意在孫而弗及子爲問且云賢孝難必
吾言不甚妄階又言成祖之在位久仁宗之在位促皆天
命也繼承之際史冊甚明上道德隆備天命所歸而今之
賢孝又中外所共聞萬萬無可疑者居月餘景王薨裕王
乃安上以服餌故病躁而戶部主事海瑞極論上過失因
風譏階上恚甚逮置詔獄欲殺之且諭階於南都治別殿
棲止以避瑞階謂瑞沽直諫名耳殺之則成其名上抵階
疏地已而取讀之又取瑞疏讀之遂得長繫始春芳訥之
共政也事階謹而朴拱階所薦也兩人鄉曲拱以朴蚤貴
事推之朴念拱侍經裕邸冀得其力兩人相與懽甚階微

聞之不懌而吏科都給事中胡汝嘉者劾罷拱之姻工部
侍郎李登雲拱與客言之而怒汝嘉內自危而又探知階
意露章劾之拱辨疏上兩解而已拱意階右應嘉恨切骨
亡何上崩階具遺詔所草創皆中節而登極詔赦尤詳切
人舉以配先帝登極詔登極詔故相楊廷和草也廷和言
至是始驗是時內閣凡六人階與春芳朴拱而益以陳以
勤張居正一日方會食拱忽謂階曰公在先帝時導之爲
齋詞以求媚宮車甫宴駕而一旦卽倍之今又結言路而
必逐其藩國腹心臣何也階良久曰公誤矣夫言路口故
多我安能一一結之且公獨不能結之邪公言我導先帝

爲齋詞固我罪獨不記在禮部時先帝以密札問我拱有
疏願得效力於齋事可許否此札今尙在拱語塞春芳等
邀而與至階室謝罪階出卽堅臥引疾拱亦引疾上俱慰
留之拱門生御史齊康極論階上謫齊康而許拱養疾階
出露郭朴私拱狀言路移攻朴朴引疾去階尋考十八年
滿自劾求去溫旨慰留不聽而命吏部議擬加支伯爵俸
錄一子錦衣千戶仍進少師璠爲太常卿賜敕褒諭宴禮
部階辭仍聽免伯爵俸會諫上幸南海子不聽上疏乞休
至三上皆優詔不許而戶科左給事中張齊露劾階六事
多御史康陳語詔調齊外任階再上疏乞歸而張居正不

欲階久居上且與高拱有宿約遂許之賜馳驛春芳等請
加恩給夫廩璽書褒美行人導行如故事居正與上左右
合起拱於家使掌吏部胡汝嘉以參議方憂居一夕自恨
死而最右階而攻拱者歐陽一敬陳贊以給事中爲太僕
太常少卿皆移疾歸一敬至在道憂死于是召齊康起張
齊而會階之鄉人陳懿德者素不悅於階自翰林謫擢之
尙寶司丞階之子前太常卿璠與少卿琨爲給事中張博
等所論行巡按御史逮皆就繫階從困中上書拱其辭哀
拱雖暴戾頗心動居正亦婉曲以解具獄戍其長子璠次
子琨氓其少子瑛家人之坐戍者復十餘人沒其田六萬

畝於官穆宗宴駕居正逐拱階事解三子皆復官年八十
天子遣行人卽家賜璽書褒諭賜金幣及繡蟒服階遣其
孫疏謝詔予官中書舍人明年卒賜祭者九復加四祭以
示重官爲治葬贈太師諡文貞

王世貞傳略

文貞子璠以蔭官太常卿琨瑛俱尙寶卿璠通敏有材
一幹長子元春萬曆甲戌進士亦官太常卿元春孫本高
官錦衣千戶天啓中拒魏忠賢建祠奪職崇禎改元以
薦起累官左都督得贈曾祖璠以下俱爲太子太傅

文貞當國值倭寇疏請發兵有功于江南詳見兵燹中
潘恩字子仁上海人嘉靖癸未進士知祁州調劇禹州州

人相語曰毋相仇避潘侯毋甚口愧太守積儲爲列城最
歲稔發庾貸之擢南京刑部員外郎遷廣西僉事督學政
持靖江王驕勒其衛卒子毋得充諸生卽充諸生必以賄
不則銀鎊其父兄恩移長史司謂王復勒諸生試者吾立
論糺汝諸生乃得就試嘗署按察篆勾捕王所匿大猾王
滋銜之上疏誣恩上遣法曹置獄會勘事得直進四川左
參議歷遷浙江參政按部海鹽島寇猝至圍之數十匝時
城無見兵但鼓舞吏人晝夜登陴不少懈城卒以全進雲
南按察使擢江西布政使出撫河南徽恭王子載堦嘗輕
去其國多掠良家子充後宮占民田賊殺無辜千百事恩

與御史悉發其罪狀論廢徙徽既失國伊庶人伎惡尤甚首鍛其鋒剪厥羽翼遷刑部侍郎再擢南京工部尚書時督餉都御史章渙嘗有疏以經略中原名觸上諱將坐以誹謗雲南巡撫游居敬與黔國相紙沐中之坐以激變恩上疏解救皆得比寬典改左都御史請飭臺綱剔利弊皆嘉納之已請致仕得允享年八十有七卒賜祭葬贈太子少保諡恭定子允哲允端自有傳

陳志

王世貞曰潘公諡曰恭定明興大臣得諡恭定者僅故大司徒年公與公而兩年公故嘗宣力泰順間屹屹砥柱者也法所謂敬順事上純行不爽公於年公有光而

天子之制命與祭辭褒揚公材德不啻稱是中外聞而

歆言之

獻徵錄

李日章字尚綱華亭人嘉靖癸未進士拜刑部主事有巨璫相謁欲有所逮捕日章曰越百里而逮人非法也不聽遷員外郎中知襄陽徙長沙先是大瀉寇數千人屢招輒叛日章督兵往討縛其酋斬若干人降若干人事聞賜金綺晉副使尋有忌者遂歸所著有狎鷗亭稿孫紹文著雲間人物志見郡乘

陳志

劉兆元字德資上海人舉嘉靖乙酉鄉薦授懷慶司理嘗慮囚一女子呼冤察其誣繫獄已二十年出之武陟富人

以女許巨室壻家後貧欲離婚責令歸其女而疑富家多
女婢恐非真有老嫗嘗識其女及歸果非真兆元怒欲按
其罪乃竟以真女成婚尋病歸至淮陰卒

陳志

徐宗魯字希曾華亭人嘉靖己丑進士令峽江舊有虛糧
累民戶多流徙請躬自履畝丈量置魚鱗冊以便疆理歸
戶冊以便徵輸富家大姓出流言阻撓比入覲夏文愍公
柄政欲移令其邑宗魯以清賦未畢辭隨伏闕具疏得報
聞獲減原額二百八十里為百八十里賦額始正逋民漸
還召為御史按閩延平永平二巨寇為梗俱授方略次第
就擒又論柄臣嚴翟一二相不法事竟以是歸所著有松寇

紀略均糧拙議南湖類稿

陳志

楊子亨字履卿華亭人嘉靖乙酉舉於鄉選順天司理密

雲田氏陷大辟誣服十八年訊出之河間民陳橋已論死

事屬矜疑廉得其情脫之平反甚眾轉太僕丞移疾歸

陳志

馮恩字子仁華亭人嘉靖丙戌進士以行人勞王文成軍

因薦束修為弟子文成甚器之已擢御史分司留臺論留

守魏公不得越江役衛卒時總憲汪鋐愾而險恩疏論之

上方喜新貴人議分建南北郊又欲令皇后出蠶北郊恩

抗疏援古親蠶郊祭之禮極陳時政乖違請停二議會彗

星見東井又劾張孚敬汪鋐方獻夫為根本腹心門庭三

臣

葺復傲范希文百官圖例悉品諸大臣得失詞甚厲上怒
 逮下詔獄適鉉遷太宰以例會審南闕門鉉令卒持轉膝
 面之恩卽起立不跪辯甚強鉉遂論比附大臣德政律當
 斬恩挺身出觀者皆嘆曰是御史鐵膝鐵口鐵膽鐵骨相
 傳爲四鐵御史及冬當就法恩長子行可刺血上疏訟父
 冤請代死得減戍雷州赦歸雷人祀之十賢堂祀宋寇準
 等穆宗登極旌諸言事者恩年七十餘矣進大理寺丞著
 有芻蕘集子行可見獨行傳第八子時可傳見文苑中
 顧中孚字伯誠華亭人嘉靖丙戌進士授萬載令復補崇
 仁有清譽遷吏部驗封轉文選出參嶺南有分巡白參軍

陳志

爲猺人蘇氏所圍中孚乃先治鹽艘誘之猺果掠去隨選
 勇士五百餘人佯作鹽船魚貫而進猺弗爲備內外夾擊
 不數日搗其巢被圍諸將士得返良家子女被掠者千三
 百人悉得歸事聞賜金綺擢江西副使尋參浙藩時島寇
 橫行延燒運船中孚請各院贖緩并捐俸償之保全甚衆
 無何乞致政先是患危症感異夢得生至是復有所遇遂
 返初服自號懶真子事見遺事息交絕游垂三十年卒年八
 十有九孫令德曾孫之璿皆舉鄉薦陳志
 包節字元達先世嘉興人其父始遷華亭節登嘉靖壬辰
 進士由東昌府推官爲御史弟孝爲南御史母夫人楊時

松江府志 卷之四十一
已老按滇聞還將上疏乞侍養會第孝亦欲請告母恚曰
教子者獨爲身謀不爲國家用邪不得已入朝巡按湖廣
風裁峻肅豪右斂手時守陵巨璫廖斌恃寵驕橫節按部
日聲寃者千人因抗章彈之斌格其章不得上反誣奏節
震驚陵寢逮詔獄減死戍莊浪衛者九年每得家報問太
夫人安否卽焚之曰老親無恙勿以他事亂吾意後母訃
聞晝夜哭泣已又聞第卒撫膺曰誰代吾奉祀哭益悲竟
得疾不起遺命以斬衰經入棺其忠孝大節時發之詩歌
悲憤激烈所著有渥中稿苑詩類選行于世子杞梓品行
淳古父歿成所匍匐扶觀還里所過哭泣路人咸稱爲至

孝云

陳志

包孝字元愛嘉靖乙未進士授中書選南御史督稅下關
摘發如神歲大饑請蠲租以蘇民上爲採納抗疏論分宜
不法事幾叵測適世宗默禱有愛惜人才之語旨卽云包
孝是人才免究孝亦遂請終養年甫四十會聞兄節遠戍
輒北望涕下事母益加謹小疾藥必跪嘗無間寒暑旣喪
母哀毀骨立未兩期亦卒學使陳公子貞檄有司同日並
祀鄉賢孝艱胤以從子林芳嗣及孝有子悉以家貲讓之

人咸多其義

陳志

吳梁字伯材華亭人舉順天丁酉鄉薦選邵武司理值島

寇踞建陽光澤間梁受檄提兵涉叢箐扼其衝破走之論
功賜金綺延平賊李元春乘海警剽掠設方略繫其酋餘
黨潰散擢刑部郎有巨猾以私敕建寺事連金吾屬梁捕
治金吾挾要璫居間不聽伺梁入朝集羣小誦之梁手捽
兩人奏御舉朝皆服出守廣西中道乞休銓部持其疏曰
是強項折中貴人者可去邪梁竟拂衣歸卒年八十有七
李于麟有貞石篇陳志

莫如忠字子良華亭人嘉靖戊戌進士授南虞衡主事改
儀制會部議孝烈皇后祔廟祧仁宗力持不可坐奪俸故
相楊一清易名未定疏請得謚文襄士論以為當擢貴州
學憲道遠不能將母投檄歸前後家食者十五年會終母
喪補湖廣副使陞河南參政領京糧道洗刷一清進陝西
按察使持法詳慎陞浙江布政使乞歸初夏文愍公中讒
死諸門下率首鼠避如忠獨經紀其喪包侍御節逮繫詔
獄瀕死治橐餽保護之工古文詩辭書法二王一時詞翰
遠近購之子是龍選貢傳見文苑中是元丁酉科舉人

陳志

馮行可字道卿官至應天府通判傳見獨行中

陸樹聲初姓林氏字與吉華亭人嘉靖辛丑進士第一改
庶吉士壬寅歸省乙巳授編修壬子請急還尋丁外艱丁
巳卽家起南京司業居二年復引疾去辛酉起左諭德掌

南院事旋召回坊不赴乙丑起太常卿掌南祭酒事是秋
陞吏部右侍郎以疾辭隆慶改元特起原官仍不就明年
奏復陸姓已巳再起掌詹事府事教習庶吉士行至淮而
返萬曆初陞禮部尚書未逾年復請告乘傳歸瀕行疏陳
十事皆關大計而辨宮府抑戚侍斥貂璫尤觸時忌戊子
年八十戊戌年九十壬寅皇太子立凡三賜存問加太子
少保給月米歲夫予其子行人彥章終養仍支月俸皆異
數云卒年九十有七贈太子太保諡文定予祭葬如例樹
聲性恬默而嚴重有骨氣登第六十四年其官兩都不及
一紀先後二三權相力皆奔走海內而寵辱之柄卒不得

加鄉衮當國所網羅推挽徧天下知名士而獨不得引以
自近居恒言士大夫于世法中惟廉取薄享可迓續壽命
其所自得者深矣

實錄

庚戌廷試分宜謀寘私人上第樹聲掌卷故混之分宜
猝無所得聲色俱厲不爲動壬申廷推內閣卽家拜禮
部尚書疏辭不允陞見畢江陵首謁樹聲接對殊簡還
報謁引席正南不少假尺寸時已有歸志疏上江陵以
微言妮之樹聲笑曰一史官二十年始出豈爲樹桃李
希揆席邪弟中丞樹德曰兄卽倦遊宜爲孺子恩澤地
答曰吾得首丘有兒行歌負薪亦任之矣乙巳九十七

無疾薨諡文定公豐頌竦肩長七尺有咫目靜深含光
內藏對日不眩每入闕昂立班中姿表特異穆廟登極
久趣不赴趙文肅云我輩豈敢以機務煩公第欲主上
一見丰采知先朝培養得如此偉人耳垂老家居稱說
古成敗得失及本朝掌故毫髮不爽有雜著詩文若干

卷藏于家子彥章自有傳

陳志

蔡懋昭字允德上海人舉嘉靖庚子鄉試署教嘉善擢知
新河縣遷守趙州冢宰胡松稱其賢擬內召而太守陳驊
齟齬之拂衣歸適有西粵顏御史思賢過趙父老攀轅泣
訴前州守治狀及去官之故顏抗章首舉之主爵卽家起

桂陽州旋同知懷慶丁外艱補肇慶海首許恩者築城陽
江沙島東連惠州林道乾遙相犄角懋昭用間示以恩信
恩降一日忽入坐恩幄呼令解散諸黨凡六千餘人遂命
將校率恩入謁制府爲請命赦不誅林道乾失援亦詣軍
門降拜思州知府城苦無井民間從三十里外取水懋昭
蕭衣冠禱天四門各穿一井水旋涌民稱爲蔡公井致仕
歸思民肖像祀之歷官三十年至不能舉火年屆九十而

歿

陳志

范惟一字於中文正公十六世孫世家吳閬父北溪始遷
松之泗涇食貧授經成嘉靖辛丑進士知鈞州擢承濟南

轉虞部僉憲湖廣分部荆西捕治土豪一方懾息潛沔堤
潰漂溺廬舍下令弛徵發粟賑貧者再擢山東參議督兩
浙學政陞按察使晉江西布政遷南太僕卿乞歸弟惟不
嘉靖己未進士終光祿少卿惟不長子允謙舉隆慶庚午
次允臨乙未進士官雲南學憲傳見文苑中惟一子必試
萬曆戊午舉人

陳志

楊允繩字翼少華亭人嘉靖甲辰進士以行人擢兵科給
事中疏論閣部大臣受餽遺不貲蓋指嚴嵩言也巳巡視
光祿有寺丞胡膏爲嚴客允繩劾其虛冒物料貪鄙不法
膏誣允繩譏訕嵩陰中之上震怒廷杖下錦衣獄比罵父

律擬絞在繫五年會星隕如雨占者以爲咎在臣下不忠
遂列名上請行刑以應天變庚申十月朔死西市後三年
而嚴氏誅穆廟登極贈光祿寺少卿諭祭廕一子

陳志

張鶚翼字習之上海人嘉靖辛丑進士授兵部職方司主
事改吏部稽勳司主事歷驗封考功文選郎中擢太常少
卿提督四彝館南通政司右通政尋遷都察院右僉都御
史巡撫貴州便道過海上時寇薄城下留以係人心者踰
月寇退乃之官丙辰以星變免歸所著有須野集易說辯
訛孫泰階萬曆己未進士歷官溫處道

陳志

宋賢字及甫嘉靖甲辰進士令新昌塞東溪以禦潦濬西

溪以備旱歲大稔徵拜御史按四川蜀世子請名以金饋却之丁父憂歸哭過哀喪明年七十五卒

陳志

賢孫天顯字敬夫崇禎時官中書舍人十七年賊陷京師天顯被執不屈死

王會字子嘉華亭人嘉靖甲辰進士授屯田主事擢虞衡郎中時將軍仇鸞怙寵故促期辦鎧甲兵仗會不為動出知桂林府鸞修前怨誣逮詔獄廷議訟其寃謫紹興通判遷建寧同知擢知漢陽府以按察副使治兵瓊州故有生熟二黎依險相附與船商陰結莫可追獲會下令吏卒有盜失不知狀及知狀不畢捕者與盜同罪不踰時盜息

無何請歸子翼恩舉戊子順天鄉薦

陳志

徐陟字子明階之弟嘉靖丁未進士授兵部武庫主事轉車駕郎改尚寶丞陞少卿歷光祿太僕太常轉南太僕卿旋改大理卿陞南工刑二部侍郎臨事剛決立朝二十年五轉皆南不假門第以進引疾乞歸卒萬曆中賜祭葬居恒儉約倭亂時諸立功死事及婦女殉節者出私帑白有司為建祠長子球中書舍人仲子琳嗣仲父陳以文貞公蔭官至楚雄守撫孤姪有恩叔子琰以父蔭仕至太僕寺丞上疏劾中官請上方劔誅貴重臣一時稱之

陳志

周思兼字叔夜

學者稱萊峰先生

華亭人嘉靖丁未進士授平度

知州歲祿身自行阡陌間不從輿隸第縛一籃輦置飯一盂其上就民間噉之旁郡飢民掠食民間爲亂幕府將加勦思兼曰此輩飢求食耳作小木牌數千散置四郊令飢民執就撫於是雲集城下開城門召入給銀米諭之復業擢工部郎省厥清源河將決募民囊土築堤堤成三日而秋漲大發民賴以全僉湖廣按察司事有五將軍者席藩封探丸殺人思兼縛其黨置之獄五將軍臂七首入因捫其臂曰毋妄動吾爲足下百口計足下乃爲此曹死耶五將軍沮而退遂條其罪詔置高墻所奪田宅子女悉還之民間拜廣西督學會痺疾不起年四十七祀山東湖廣名

宦子紹元紹節見文苑隱逸傳陳志

楊豫孫字幼殷樞之子年十七舉應天丁酉鄉試登丁未進士授南考功主事轉禮部祠祭郎中擢湖廣提學副使陞河南參政入爲太僕少卿改太常時徐文貞當國引豫孫暨陸莊簡公自輔凡海內人物國家典章悉諮而後行出巡撫湖廣踰年卒于官年四十七所著有經史通譜成史琬琰錄詩文集若干卷以無子遺稿多散佚云陳志

楊中丞爲部郎時以才敏稱嚴世蕃自負甚嘗對客稱曰天下人才惟吾與楊博楊豫孫耳公亟遠引避之明世宗嘗手敕徐文貞不可句讀文貞窘以示公卽能解

據以報聞輒稱旨以是益重公公配張氏亦有材略以

守公殯遇害

事見遺事中

郡人痛之

李昭祥字元韜華亭人嘉靖十六年應督學試第一賓興日有司以白金代燕昭祥曰非禮也率諸生謝卻之是歲舉于鄉丁丑登進士授浙江蘭谿知縣俗生女不舉昭祥令民間育三女者復其身三年遂無棄女者陞南京工部主事轉郎中會本生父喪移疾歸已遂致仕昭祥性至孝八歲喪母哀毀如成人嗣父塾爲沙縣簿坐事昭祥走數千里訟其誣得白塾晚舉五子撫之皆有恩友人行人司副唐志大歿而家貧昭祥迎養其母撫其諸子宋堯咨客

死留都殮而歸其喪置義田五百畝以助里徭飢疫後令人埋掩齒骼其施惠類如此所著有澱陽雜稿慎餘錄龍江船廠志讀史一得棲雲館集總若干卷子容春含春以孝友稱容春子繼元萬曆四十三年舉鄉薦授臨湘知縣縣人至今思之陞刑部郎請終養歸含春七子繼沆繼涉最知名繼涉早世學行純粹有萬石風郡人舉家世守禮者多稱李氏云

高士字淳甫嘉靖丁未進士司理寧波阮甲者以殺人論死士疑其冤默禱于神夢中恍惚以阮乙告詞得其人一訊而服御史行部至責一曹吏移怒令士前曰以一曹吏

故庭辱令非禮御史悟益賢之奏最得祠部主事念父乞
南改南吏部主事尋移疾歸季弟年從弟選俱以孝聞年
子承祚萬曆乙未進士官翰林院簡討傳見文苑中陳志
龔情字善甫上海人嘉靖癸丑進士授行人擢禮科給事
中值警報笏午首疏飭邊防預儲蓄均兵餉蠲額徵四事
復疏止詔取太倉銀詞極剴切以會勘伊庶人不法事忤
當路外謫尋陞南虞部隨罷少聘韓氏女病廢或勸改聘
不聽女亡始議婚性伉直言論手采有古人風陳志
龔愷字次元情從弟也嘉靖丁未進士授慈谿令入為御
史會咸寧侯仇鸞倡馬市首疏論之杖闕下得不死視兩

淮鹽政按西粵吏不職者望風解綬去尋列靖江王驕恣
狀復疏止大征粵寇上是其議當事者以此忌愷出為山
東參議屬大蝗下令捕蝗者易粟倍于是蝗不為害遷湖

廣副使引疾歸卒

陳志

董傳策字原漢綸曾孫也九歲能屬文嘉靖庚戌進士是
時分宜父子怙寵不法諸臣以直言觸忤抵死者數輩傳
策為刑部主事借給事中吳時來同官張翀疏論分宜六
事上之謂其隳邊防鬻官爵蠹國用樹黨與擾驛遞壞人
才擅國國危請斥之以謝天下上怒下詔獄問主使拷掠
慘毒再絕復甦幸不死會地震得宥謫戍南寧時按廣御

史爲分宜私人傳策戴大帽跪舟次呼曰軍董某見御史趣迎之幾墮水有宣尉某齎寶劔玉幣相謁立戶外累日叱卻之隆慶改元復原官尋擢南京禮工二部侍郎爲人清剛繩下急臧獲無賴者懼不免遂及于難弟晉隆慶丁卯鄉舉晉孫象恒萬曆己未進士官浙江巡撫都御史屠寬字德宏上海人嘉靖癸丑進士授南駕部主事陞祠部郎轉浙江僉事調滇南滇撫鄒欲誣黔國大逆委寬推鞫止罪其奴鄒復誣奏鐵索箐居民嘯聚得旨勦捕寬釋放平民數萬鄒益恚坐罷歸後有頌其事者復召用不起家居貧甚卒年八十一

陳志

唐繼祿字子廉上海人嘉靖癸丑進士授遂安令募勇壯數百人儲米粟數千石未幾倭內訌所至殘破遂安獨全有殺人獄旣具稱寃不已往驗無傷惟心道斂如石立訊曰汝乃飲之滷乎囚叩頭服召爲御史歲大旱疏修省十事又奏行里甲法著爲令出按湖廣會興山盜起聚衆三千餘人縣官不以聞郡守徐學謨上狀繼祿卽下檄先縛縣官陰遣沙市趙巡簡詣賊寨諭以朝廷威德令早自解散待以不死還籍者毋得擅誅月餘賊黨盡散擢大理丞晉少卿遷操江僉都御史晉副都御史治屯鹽以疾告歸居家儼如在官不作土音絕無褻容卒年五十一

陳志

趙灼字時章嘉靖丙辰進士授行人拜刑科給事中疏陳
三吳水災乞蠲賦言甚詳懇轉戶科時江南民歲輸廩於
諸曹人衆地分奸蠹百出灼疏請立祿米倉以司徒屬二
人主之歲省民財以萬計遷吏科都給事中晉右通政卒
年僅四十五兄廷炯嘉靖乙卯舉人官至潯州守以才行
稱孫東曦自有傳

楊銓字朝明嘉靖丙辰進士授行人擢南吏科給事中營
卒變起大司馬恐激變甘言婉撫銓計擒首惡上疏極言
其不可縱無何河池營復毆其偏將因劾去大司馬朝論
避之在南垣七年三遇大計先後所劾卿寺藩臬勲貴不

下百人擢江西副使晉廣西參政會所前劾銜舊怨構蜚
語中之報罷做衣糲食僦居南禪僧舍年七十五卒

陳志

楊道亨字豫甫青浦人嘉靖丙辰進士授行人遷刑部郎
擢真定太守築滹沱堤以護城濠久之滹沱水橫堤且潰
益置水牛竹槌捍之身立城上爲文以禱水有若青羊者
一目獨角昂首而逝水遂減民咸稱神遷雲南副使去而
前撫臣故新鄭客與道亨有卻且謂華亭鄉人借此劾奏
因下御史按問諸將作受直咸有狀吏民叩頭諱曰楊使
君僅飲一杯水奈何以腐粟蠹之御史上疏曰故真定守
道亨材而廉廉者不必盜材者亦不須腐粟事得白復其

官而道亨已卒

陳志

張仲謙字士益莊懿公五世孫嘉靖己未進士時徐文貞居政府仲謙姑爲文貞夫人朝見出與諸進士旅進旅退不私謁文貞授職方居武庫七年大司馬楊襄毅爲文貞言武庫郎賢且積資久宜置要地文貞以語仲謙漫不應謂兩尊人春秋高願得外補以便省覲遂參議楚藩文貞既罷屬新鄭修故却根株其親黨仲謙入覲偕一鄉人同見新鄭問曰與徐公戚乎仲謙曰徐公夫人家姑也新鄭改容曰真古君子徐公在事何久不聞公名仲謙爲治喜平反楚囚某年十二以奴傷人抵死謙謂宜坐奴且年十

一不當死出之茶陵州守黃成樂能於官以誣被繫言於當事得無恙後黃治吳淞有功遷江西副使進雲南參政黔國兄弟構隙幾弄兵仲謙移檄留都分別其事解之聞父喪歸堅臥不出兄弟友愛出入與俱隱居三十餘年年八十六卒

陳志

潘允哲字伯明恭定公子嘉靖乙丑進士授新蔡令時淮汝水溢漂沒民居請穀賑之流移盡復調義烏徵拜南臺按上江出守黃州擢山東憲副內艱服闋督學陝西嚴示程軌士翕然從之會得恭定手書語失詮次心動曰翁其殆乎卽解綬歸中途訃聞號眺五千里三年笑不見齒允

哲不事家人產贏衣菲食戊子歲祲至于絕粒恭定所遺
外不益一畝一椽未嘗與齊民爭尺寸卒之日知與不知
皆流涕云

陳志

潘允端字仲履恭定仲子嘉靖壬戌進士授刑部主事以
父在法曹改調南工部權龍江關稅以寬郵諸商稅入倍
尚書以問允端正色曰某豈聚斂臣邪轉兵部以憲副分
巡青登巨盜憑險阻出沒廉知左右有為賊耳目者貸其
罪而遣之令誘致賊縛其魁餘黨悉解島人以歲時入市
武弁等襲殺為功諸島稱亂乃暴武弁罪而檄諭諸島咸
叩戟門感泣去晉參政理漕儲先是有司交兌後時領運

者多怠事比入河河水暴漲數敗舟北上早寒冰合舟不
能達于是以期會督有司部勒諸官軍以二月至淮五月
入閘八月達天津于瓜州建閘以避江濤令白糧民船尾
漕艘而行漕政為之一新又以運軍過江領兌多不以時
乃定議給直永免民運瓜儀之累遷蜀右轄時九絲用兵
不數月費金三百萬愕然曰曩東南中倭禍數年費不及
二百萬今都蠻小醜費至此乎督府方以平亂超擢用事
聞其語心銜之阨之使歸歸搆樂壽堂奉恭定居其中以
篤孝稱孫桓天啓丁卯舉人有文名煥寅順治中仕至監
司曾孫堯彩順治乙未進士郡舉世家稱潘氏

艾可久字德徵上海人嘉靖壬戌進士授太常博士擢南
 御史巡視上江劾勳貴驕縱及附新鄭大臣者四人陞知
 衡州府擢山東憲副累遷江西陝西參政遷按察轉山西
 布政擢南京太常卿轉通政使請告尋卒予祭葬陳志
 陸樹德字與成文定公弟嘉靖乙丑進士司理嚴州盡法
 無貸陞刑部主事改禮科給事中穆宗每朝及經筵默不
 發一語疏言上下交為泰非與公卿輔弼相論難何以勵
 君德酬萬幾又條議諸邊計甚析上不豫中璫有請開戒
 壇為上福利者抗疏諫止進尚寶卿應天府丞太常少卿
 太僕卿擢右僉都御史出撫山東請裁募兵費蘇里甲戒

苛罰俱報可移病歸先文定數年卒子彥禎萬曆乙未進
 士官南吏部考功主事有才識孫景朋萬曆癸卯舉人曾

孫慶紹崇禎壬午舉人

陳志

張明正字公甫華亭人嘉靖乙丑進士授南禮部主事轉
 文選已出副滇憲轉東粵粵故盜藪多浪於兔二蠻世盜
 珠明正決策一鼓縛其帥功奏資金綺遷蜀憲使轉本省
 右轄議罷鑄錢蜀人德之轉貴州左方伯丁母憂起補福
 建告歸卒年七十萬曆中孫瀛選賓選相繼登鄉薦陳志
 許汝升字南征嘉靖辛酉舉人守陳州令民有罪者入粟
 實倉儲凶歲備後歲果大祲民賴儲粟全活甚眾改鄭州

遷溇州府同知卒子身萬曆甲午舉人孫譽卿癸丑進士
為名諫議

陳志

宋堯武字季鷹御史璪工部瑛之從孫也隆慶戊辰進士
除知信陽州改貳惠州林道乾者擁眾數萬相小琉球三
年將謀奪其國國人不從乃復航海戊寅春率舟師突至
將士皆譁堯武登舟以義諭之道乾乃仰天而言曰明公
以德言綏我逆之不祥顧語健兒簡部中惠州女子十八
人委之而去母服闋補福州守尋掌嶺北道晉參滇南分
守金滄姚關戍兵陰懷異志語之憲臬弗信未幾執別駕
以行堯武勒士著合蠻兵截其歸路乃乞降其渠有就法

者巡按御史悽然曰早從參知寧至是耶初撫臣李公材
征緬甸捷還忽訛言濫叙婦人級御史訪之堯武曰李公
以道術自期明公奈何發大難會有挑之者御史意遂決
露章上天子震怒緹騎逮撫臣至擬午門誑言律人皆寃
之御史大悔曰吾不從參知言遂至此入朝賀萬壽節事
竣告歸卒年六十五有八子文學茂韶最賢孫徵璧崇禎
癸未進士今官潮州知府

蔡汝賢字用卿華亭人隆慶戊辰進士授大名推官召入
省歷長諫垣出參四川藩政晉福建憲使浙江右方伯調
蜀再改閩除廣東左轄以中丞節撫廣西擢副南樞滿考

松江府志 卷之四十一 三十一
賜贈廕尋致仕歸踰年卒享年七十有二汝賢在大名捍
河決全活者衆在諫垣因時議請祀陽明先生遂上崇正
學祀真儒一疏乞以羅仲彥李侗兩先生從祀時論快之

陳志

林景暘字紹熙華亭人隆慶戊辰進士選庶吉士授禮科
給事中明神宗幼冲小璫客用等在左右景暘進十二箴
以諫又疏請正大明會典宗藩事例皆允行轉兵科左巡
視京營請廣召募立選鋒均糧賞勤教演凡十餘事時張
文忠當國綜核名實景暘所奏皆得實行軍政爲之一新
尋進太常少卿以念父乞改南就養得南通政進太僕卿

丁父憂毀瘠幾不支服闋撫按數薦景暘竟不出家居時
會當事欲改金山衛爲州景暘遺書撫按謂設州必多置
官吏所治少而所擾多事得寢應撫胡執禮令所屬縣田
出助役錢率七十畝徵一金景暘固爭謂蘇松歲輸正賦
以數十萬計民力餘幾且一絜爲令有日益耳民隱謂何
遂得減十之七南人賴焉景暘少通經以經學教郡中其
高足弟子如馮大參時可以文名天下丁丑會試分校得
士如馮宗伯琦敖宗伯文禎皆爲名臣將卒出田百畝以
助學又以三百畝贍族語不及家人產人以此多之年七
十五子有麟官至龍安太守以清謹稱

喬木字伯梁上海人爲諸生試輒冠其曹倭難起以諸生
 守陴發礮石殪死甚衆隆慶戊辰成進士守吉安州州當
 貢粟木上言明主奈何以口實累民請罷貢獲報可擢僉
 憲河南備兵井陘茨溝營卒多烏合跳而盜曠不可跡乃
 選土著八百人充伍漸汰諸募者盜以是息歲祿以便宜
 發粟全活甚衆遷福建參議解組歸子拱璧自有傳陳志
 李伯春字友卿昭祥從子也隆慶辛未進士授刑部主事
 以明允爲尙書嚴清所器使修定條例晉郎中出知濟南
 府屬歲饑民王登以妖言煽衆擒置之法登妄稱內外黨
 千餘人皆勿問出倉穀鉅萬斛賑貸人心遂安遷浙江按

察副使轉湖廣參政守陵中貴孫某欲奪民沙洲田又橫
 索里夫折直皆挫抑之尋以母老弃官歸有兩弟仲春叔
 春皆親自教授叔春登萬曆己丑進士除福州府推官丁
 艱起復台州入爲刑部郎陞歸德知府值河決後城郭傾
 圯饑民數萬聚葦澤剽掠監司欲興兵叔春固請解散之
 皆感泣來歸又蠲逋責給牛種戶口漸復後論調歸起按
 察副使乞休伯春兄弟同堂共爨友愛甚篤仲春當伯季
 仕宦常主奉養孝謹尤著及歿室無私財伯春以產均授
 其子焉伯春第二子繼厚萬曆戊午鄉薦仲春孫之楠天
 啟辛酉舉于鄉之杜順治中以明經貢太學



許樂善字修之華亭人隆慶辛未進士仕邳縣令入臺掌河南道典甲辰大計晉南光祿卿改南通政使請告歸樂善在邳蠲除酒稅修築邑城邳民賴焉在臺中值江陵奪情總憲率諸御史上公疏慰留諸御史皆署名樂善爲江陵門下士獨不署按畿南有棗強令倚門第滋爲不法竟劾治其罪主計時條上六事遂著爲令甲又疏請停礦稅救建言御史曹學程舉朝稱之其後兩起卿秩旋赴旋歸與陸文定後先以恬退稱所著有適志齋稿卒年八十賜祭葬曾孫纘曾成順治己丑進士入翰林進官坊今爲河南按察使

俞汝爲字毅夫華亭人隆慶辛未進士爲德化令築堤自郭州抵德化延袤三千餘丈旱潦蓄洩邑人稱爲俞公堤入駕部出山東僉憲歸侍養卒年七十一子廷諤天啟甲子舉人以博雅稱于時陳繼儒修郡志廷諤實佐之王文炳字象南上海人隆慶辛未進士授四川叙州推官叙有山峒名九絲蠻者卽孟獲後時出擄婦女貨財官兵逼之則入關關名凌霄地險絕時蜀撫曾省吾初爲旁邑令值蠻出幾爲所害及撫蜀議進討取文炳贊畫文炳乃自裹糧帥師從山後破凌霄馘蠻王阿大阿耆等設武寧衛城功上晉秩一階入刑曹出知慶遠陞貴州憲副致政

歸卒年七十六

陳志

王明時字治甫華亭人萬曆丁丑進士刺冀州莒州莒多
逋賦與盜爲革耗羨嚴職質賦清而盜戢入爲刑部郎出
守岳州擢河南按察副使乞養母遂不出明時居官四十
載僅葺一廬垂老不能有及身而弃之其清如此族有富
人將死以子托明時子垣惠垣惠又死明時爲撫視成立
乃簡遺篋盡出其貲歸之人以爲難卒年七十五孫鍾彥
自有傳

徐三重字伯同青浦人祖壽父沛皆有隱德見獨行傳三
重成萬曆二年進士五年廷試第二甲授刑部主事時政
尙綜覈三重獨持平恕尙書嚴清知其詳慎使掌封事每
有疑獄必咨度焉是歲暑讞寃滯咸理清爲冢宰欲用之
銓曹而三重得疾請急歸念父老遂致仕依親以居父卒
慟絕而蘇三重操行端潔門庭肅穆坐無雜賓少博洽工
詩文旣謝病歸一切弃去潛心性命之學以朱子爲宗學
者稱爲鴻洲先生所著有庸齋日記信古餘論牖景錄采
芹錄鴻洲雜著徐氏家則年七十八卒子禎秩以孝謹稱
禎稷字叔開萬曆辛丑進士官刑部主事初三重在官欲
出一死罪弗得會病免至禎稷入西曹猶以屬之父子後
先爲刑官皆以平允爲世所稱禎稷出守三重爲政要二

十四條示之及備兵川東以三重年七十乞侍養後屢薦不出以名德重于江南禎穆子銘常崇禎時領鄉薦而禎秩之子銘敬亦登鄉薦人以爲積善之報云

吳炯字晉明華亭人其先有良佐者嘗爲應奎文會見文苑中炯成萬曆庚辰進士至己丑乃廷對授杭州推官民盛瀚得罪御史誣之大辟者三十年炯辯釋之甲午擢南兵部歷陞南太僕少卿時顧憲成講學東南多借資者疏別白之事核而氣平識者稱其有關世道居鄉置義田三族仰食郡邑諸生赴省試咸爲給資助邊至萬金人高其義而炯未嘗自負也卒年七十有七賜祭葬

陳志

方應選字衆甫華亭人萬曆癸未進士刺冀州州多大猾有納觀中輦而行劫者應選廉得之漏下三刻馳往捕咸就擒丁內艱起汝州葺汝乘識者謂可培康德涵武功志擢職方改武選時議封倭酋大司馬實持之應選抗言非便弗聽東師果敗以憲臬視兵盧龍改督閩學政以勞瘁卒于官文集若干卷行于世

陳志

唐文獻字元徵珣四世從孫也萬曆丙戌擢進士第一人授翰林院修撰乙丑分較南宮太子出閣

即明光宗

文獻爲講

官每講畢大璫出揖不通一言丙申遷中允丁酉轉諭德尋以病請己亥起原官庚子晉庶子兼侍讀先是楚宗告

其王陰事下禮部時江夏郭正域為少宗伯與輔臣沈一貫議不合正域遂白免去值匿名妖書起詞牽官掖上震怒上萬曆也大索一貫疑正域知其事授意金吾捕其臧役備極拷訊無所承又使人迹之引繩批根文獻素知正域慨然曰天日昭昭可昧邪率同列詣閣危言白其事會御史大夫溫純御史牛應元湯兆京執不宥署奏正域獲免文獻實有力焉給事中李沂劾大瑞不法逮杖闕下文獻徒步掖之手調湯藥沂得生還壬寅晉少詹癸卯晉禮部右侍郎掌翰林院甲辰副考會試秋教習庶吉士乙巳病卒年五十七人共惜之贈官保尚書賜祭葬謚文恪幼子允

諧登甲子賢書

陳志

章憲文字公觀華亭人萬曆丙戌進士官虞部郎督潞王行殿於通灣權璫主乾沒憲文持議堅不能奪又督漕艘于淮釐剔積弊省採木金以萬計丁外艱服除又丁母艱遂絕意仕宦憲文博綜典故所著有陶白淮南白石山房諸稿行于世從子元衡戊戌進士元復辛酉科孫簡甲子

科陳志

施大經字天卿宋華亭令退翁十一世孫也萬曆乙酉舉人署丹徒教諭遷江西瑞州府通判時稅璫議採木大經抗言曰開採名為利其實厲民民迫將為盜篋箒深阻貴

人能預爲撲滅地乎璫語塞遂止郡有嫠婦涂氏族人利其貲誣以陰事婦家迫謀于吏黃某使進千金大經曰枉而白之我分也奈何汚我杖吏卻金卒白其誣積二載引疾歸再起惠州通判轉崇府審理正歸著有澤谷農書若干卷子沛溥沛字沛然天啟初以貢除河南通判會出師勤王給素袍士譁兵備楊嗣昌以屬沛使易五色時已夜沛悉召梓工以萊蕪雕花朱墨雜印作彩前後以絳布綴日月形黎明畢具師遂發轉南康同知不赴後嗣昌督師致書邀沛許以監司沛習其爲人堅謝之尋卒沛素知醫家言既罷官益精其術活人甚衆溥字汝中崇禎中以貢

授順天永清衛經歷十七年秩滿遷樂亭知縣未赴京師陷于賊百官皆被驅脅溥嘆曰我父兄皆荷國恩我豈可失臣節遂仰藥死

陳所蘊字子有上海人萬曆己丑進士授南刑曹調吏部叅藩江岳憲副大名皆有聲督中州學政莫敢以薦牘通尋以叅政分守大梁有奸弁上疏請覈河南羨帑者乘驛南來當事震動連語拄之弁竟坐妄言逮未幾乞休後起南岡少甫半載趣歸所蘊性方嚴已請老地方有大利弊往往以片言抵定年八十有四卒

陳志

李諫字格卿青浦人萬曆戊子舉人署金壇教諭入爲南

國子學正遷工部司務刑部員外郎擢守四川叙州郡中
歲散軍餉每有贏前守以入橐著爲例諫叱去之致政歸
卒年七十七子世祺壬戌進士官太僕卿孫淑天啟丁卯

舉人

陳志

楊繼禮字彥履華亭人萬曆壬辰進士以庶常授編修甲
午與修實錄所撰后妃外戚傳時稱直筆乙未戊戌分考
庚子典江右試壬寅陞贊善癸卯轉中允充日講官甲辰
晉官諭掌南京翰林院病卒繼禮性至孝痛嫡母曹淚盡
血居官時楚中有警戕撫臣移檄郡國有順流而下等語
明神宗以問親臣繼禮言此不過恫喝語耳非久自定閣

臣以置對後果如其言生平敦尚友誼沒之日識與不識
皆哀之子汝成天啟乙丑進士官至禮部侍郎父子登翰
苑俱有聲郡人美之

董其昌字玄宰上海人父漢儒耿介力學其昌初就塾比
夜漢儒從枕上授經悉能誦記成萬曆十六年進士

已丑科

選庶吉士禮部侍郎田一儁以教習卒官其昌請假走數
千里護其喪歸葬還授編修知起居注明光宗出閣充日
講官因事啟沃光宗每日屬之主考江西尋有忌之者出
爲湖廣按察副使陳疾歸三十二年起爲湖廣提學副使
踰年致仕起山東副使登萊兵備河南參政並不赴光宗

踐阼問閣臣曰舊講官董先生安在乃起爲太常寺少卿
掌國子監司業天啟二年改兼翰林院侍讀學士纂修實
錄奉詔至江南采錄諸司掌故凡萬曆朝章奏案牘輯爲
三百本其留中之疏有切于國本藩封人才風俗河渠食
貨吏治邊防議論可施行者別爲四十卷做史贊之例每
篇系以筆斷書成表進有詔褒美宣付史館二年遷少詹
事掌南京翰林院轉禮部右侍郎四年充纂修實錄副總
裁同知經筵尋轉左侍郎還部五年遷南京禮部尙書時
政在奄豎黨禍深酷其昌深自引遠遂謝政崇禎六年召
拜禮部尙書掌詹事府事七年進太子太保乞骸骨溫旨

慰留章七上乃允賜乘傳還九年卒年八十有二訃聞輟
朝賜祭葬贈太子太傅謚文敏其昌天才俊逸善談名理
在講席見知于光宗爲僉人所忌然不激不隨故免于黨
人之禍少好書畫臨摹真蹟至忘寢食中年悟入微際遂
自名家行楷之妙跨絕一代其畫集宋元諸家之長行以
己意論者稱其氣韻秀潤瀟灑生動非人力所及也四方
金石之刻得其制作手書以爲一絕造請無虛日尺素短
札流布人間爭購寶之尤精于品題好事家至今引重焉
所著有容臺集行于世

沈時來字君大學士黎七世孫也萬曆壬辰成進士除行

人棲遲十載始授御史董役長陵巡閱三關庫寺京倉出按江西以暴疾卒于途時來使寧夏當字逆兵火後爲之減膳卻餽藩邸重之在西臺省陵工冒破以鉅萬計條革糧長解額公私便之惜不究其用云

陳志


王孫熙字君文華亭人弱冠以文名時嘉興馮夢禎同郡唐文獻方應選張廷傑輩皆有譽望咸推孫熙廷傑延之于家生徒講授常數十人萬曆乙未孫熙成進士授候官知縣候官號難治令率以鈎距勝孫熙獨務簡靜獄訟用息丁母憂去職服闋除天台知縣入爲大理寺評事有巨璫坐弃市行萬金求免孫熙曰爾金如山我案亦如山論

如律大理卿救之執不可出爲台州知府台土瘠有麻莫不知織生女多不舉乃購工爲機杼示之教以經緯之法嚴溺女之禁久之所育女皆任織衣被一方號爲王公布郡戍卒八萬餘人餉稍後期輒譟孫熙在台久兵戢入覲還會子元瑞成進士卽引疾歸卒年八十八元瑞字伯禎授泰和知縣以治最徵拜御史遭母喪遂終養不仕居鄉潔清自立表率士林者三十年子孫能以文行世其家陸彥章字伯達文定公子也成萬曆己丑進士文定以盛滿爲懼使勿預館試乃從選人得行人司行人文定踰艾生子時春秋八十彥章事親謹自以奉養日短不欲遠違

在職二年乞終養朝廷嘉許特予半俸前此未有也後十餘年遭父喪既葬廬于墓側告于墓曰生為祝聖之民死作依親之鬼山川草木實聞此言服闋堅臥不出葉文忠向高執政尤推重之萬曆三十九年即家拜光祿寺丞臺使檄府趣發彥章不得已乃之官四十二年轉本寺少卿均節出納拒中璫額外之請甚允時論四十五年遷太僕寺少卿遂引疾歸天啟四年以光祿寺卿召彥章堅辭崇禎二年召為刑部右侍郎以病未上明年卒于家彥章蚤有聲譽以名卿子通籍四十年門庭無增飾輿蓋僕從務為簡素難進易退綽有父風工詩文書法妍雅小楷尤工彥章有五子諸孫十餘人並有文藻慶曾舉

本朝丁酉鄉薦慶衍慶臻崇禎壬午鄉薦慶衍成進士慶裕以明經貢禮部皆知名

張以誠字君一南安知府弼玄孫也始生室有異光四歲能讀書稍長肆力于文章經史百家朝章典故莫不該洽名日益高萬曆二十年選貢太學遭生母喪或以壓嫡為辭且便省試以誠泣謝不可持服如制萬曆間制舉業海內推嘉興馮夢禎既而會稽陶望齡上海董其昌相繼稱宗匠以誠後起清純高古與三人並稱時夢禎為祭酒得所試義恨相遇晚首列之示六館為楷式辛丑成進士廷



對擢第一人授翰林院修撰以誠舉止安雅敦尚名節以
古人自期丁母憂孺慕無間所生人以為難服闋起知起
居注三十八年分考會試四十年主考福建多得名雋遷
左春坊左中允以東宮久虛講席上言宮闈非進學之地
內侍非勸學之官宜命皇太子出御講筵以重國本慰人
心援引得失詞旨剴切時論避之四十一年轉右諭德乞
省親未報會使命還父疾作以誠晨夕籲天願以身代父
卒哀毀如不欲生營葬勞瘁歸而咯血遂不起年四十八
以誠門無雜賓勤于筆墨短箋小疏咸出手裁其文章宗
蘇詩擬孟襄陽小楷規摹大令清勁有法所著酌春堂集

若干卷第四子安茂成順治丁亥進士授工部主事筦清
江榷攝漕政擢浙江提學僉事今為陝西布政司參議分
治西寧

張所望字叔翹上海人萬曆辛丑進士除刑部主事奉使
榮襄靖江三國錫予餽遺一無所受諸王敬焉轉員外郎
郎中出為衢州知府衢俗囂訟多引儒生為證而奸民為
兩造師譎變競巧所望廉得主名單詞寸牘知出誰手如
射覆剖決若神衢大治遷副使備兵蒼梧嶺表法令久弛
所望至繕城隍實倉廩簡屯戍若藤峽昆侖鬼門句漏諸
要害無不身歷窮山炎谷喜見大吏皆搏醵受約束有羅

運猺者阻溪洞戕殺熟猺所望馳檄諭之遂輸貢爲編戶
蓋漢以來所未賓也轉參政移治左江左江遷隆峒長官
黃兆基愛少子鎮西而殺長子鎮隆鎮隆有遺孤嘉祚當
立吏目黃文舉挾鎮西爭襲仇殺累年所望率兵討平之
將吏請郡縣其地邀延世賞所望曰師來定亂奈何斬人
祀以自利乃誅文舉立嘉祚而還口不言功粵人善爲蠶
所望獲其魁吳向春窮竟之滅其術擢廣東按察使不赴
起爲湖廣按察使理漕政時方用兵急轉輸以勞悴疾作
解職歸再起山東右布政使固辭所望清羸如不勝衣而
執義強固當大事持正議侃侃不阿急人厄難無遺力常

買女婢吳氏知爲故茶陵州孫也撫爲己女擇良士具匱
飾而歸之年八十卒所著有梧溥雜佩嶺表游記幅員名
義攷文選集註辨疑龍華里志

徐光啟字子先上海人萬曆二十五年鄉試解元甲辰成
進士選庶吉士光啟常學聲律工隸楷及是悉棄去習天
文兵法屯鹽水利諸策旁及工藝數學務可施用于世者
滿三載授翰林院簡討四十一年分考禮闈遷贊善四十
七年擢詹事府少詹事兼河南道監察御史出練兵賜敕
如巡撫監司副帥悉受節制得自委任辟召會天啟改元
光啟乃辭疾歸尋召還與兵部尙書崔景榮議不合御史

丘兆麟露章劾之誣及其練兵事復謝病歸魏忠賢素嫉光啟御史智鋌追論之勒罷官崇禎改元起爲禮部右侍郎協理詹事府事同知經筵明宗憂國用賈御經筵歎曰焉得天雨金乎大禹時天雨金秦雨金于櫟陽此外寧復有光啟進曰周成王亦有之書在臣邸舍中取視之信異日讀離騷問曰圓則九重天有九何也光啟對曰宗動一天也恒星一天也七政各一天合而爲九因及日月薄蝕五星順逆之故日昃始罷對又上言京東西屯田及曝沙種鹽策數萬言宗讀之終日意嚮用之二年轉左侍郎旋加太子賓客是夏日食失驗欲罪臺官光啟言臺官

測候本郭守敬故法元時常當食不食守敬且爾無怪臺官之失占也臣聞歷久必差宜及時修正□宗從之乃詔修曆敕光啟領之初劉基造大統曆雖用授時法而郭守敬之術不傳守敬之言曰古之日長今之日短法當以七十五年爲消息上推益一下推損一天官家莫曉也光啟獨得其意以泰西勾股測弧之法三線交而布算用測圓弧以黃道緯度爲主視授時用黃道距度其法加密其後日食臺官法大謬而光啟所推亦差杪忽乃更求所未合定之曆書告成三年進禮部尙書掌詹事府四年夏五月懷宗手敕光啟以本官兼東閣大學士叅機務五年進兼

文淵閣大學士加太子太保光啟在閣值周延儒溫體仁後先爲首輔光啟不得展時年已老六年秋九月以勞瘁卒于位訃聞輟朝三日賻錫有加贈少保謚文定十四年
□宗思之求其遺書于中書舍人驥入謝進農書六十卷詔進贈太保錄其孫爲中書舍人命有司刊布其書又有毛詩六帖漕河議兵事庖言幾何原本歷指等書總百餘卷

張鶴字世調華亭人萬曆甲辰進士選庶吉士砥勵名行爲文章務通達國體授簡討較禮闈進司業歷官諭擢南京吏部侍郎纂修實錄加太子賓客天啟中以忤璫削籍

崇禎初起掌詹事府兼吏部侍郎卒于家贈禮部尙書諭祭賜葬鶴在明熹宗時天變陳言八事指及官闈痛激感憤幾及于禍天下推爲正人居鄉簡酬應好薦引後輩沒

後人懷思之

陳志

黃體仁字長卿上海人萬曆甲辰進士時館李文節廷機家廷機使試館職體仁謝曰某老矣不足以辱此選有門人徐光啟者博學而賢用世才也請以自代故光啟入翰林而體仁爲刑部主事遷員外郎轉郎中出知登州府罷坊市雜稅豪右斂手衛有明建文忠臣陳廸子孫尙在戍籍爲之陳乞脫伍又爲廸與戚繼光請謚秩滿擢東交道

副使值歲祲而福王之國舟車填湊體仁裁置以法因條上臺使盡革迎謁供億諸費民甚愛之而當路不悅罷歸所著奏議詩文雜著二十六卷撰續上海志田賦諸篇稱詳覈云

姚士慎字仲含萬曆甲辰進士選翰林院庶吉士授吏科給事中遷尙寶司丞轉光祿寺少卿遷順天府丞轉左通政值魏忠賢擅政士慎謝病歸崇禎初進南太常寺卿擢刑部右侍郎進爲尙書免歸卒

王善繼字孝冲華亭人萬曆甲辰進士授刑部主事大璫高淮以遼左不法事就逮馬謙亦以盜庫鈔事覺先後下部善繼抗議以爲二奸依憑城社蠹邊耗國宜亟下所司究如律朝論躉之擢守建寧以勞疾乞休當路惜之子獻吉萬曆丙午解元爲膠州守有惠政膠人思之

喬拱璧字穀侯副使木子也萬曆丁未進士授浙江海鹽知縣縣土田匿不可稽拱璧按履畝故籍勾考歸戶悉得其實覈虛丁絜而均之一邑稱平所隸廣儲常積二倉貯衛士餉往時雜支本折侵耗百出拱璧請以冬月支屯糧夏月赴府支銀錢春秋月支倉米人予左契合驗而給之詭冒竝絕遷工部主事改兵部武選司左遷順天府教授尋陞南兵部郎出爲湖廣僉事轉參議未上卒

松江府志 卷之四十一
夏嘉遇字正甫華亭人萬曆庚戌進士司理保定卻醯羨
數千金署篆盡革常例發倉賑貸全活甚衆廉惠爲畿輔
冠召入授禮部主事時給事中元詩教御史趙興邦挾政
府恣爲奸橫人莫敢犯嘉遇奮起彈其悞國之罪連上五
疏邪黨側目尋改南禮部天啟甲子冢宰趙南星用物望
題補銓司署選事魏瑞囑姻黨陳九疇借會推晉撫侵嘉
遇屢疏抗辨被斥歸尋起大獄削其職懸坐行賄千金矯
旨提問罰俸薪趣赴配所嘉遇抑鬱不起崇禎改元贈太
常卿予祭葬崇祀澤官子長泰成順治乙未進士今官刑
部郎

錢士貴字元冲華亭人萬曆庚戌進士授進賢知縣丁憂
服闋補上饒以治行徵拜御史時有移宮紅丸挺擊三大
案獄久勿決下廷臣議士貴議曰選侍移宮在停封一月
之後卽無垂簾之舉而閣臣不力爭泄泄以處羣疑之會
何以厭服衆心李可灼妄進紅丸鼎湖載泣人思剗刃而
閣臣保惡容奸使得優游里居欲辭趙宣子之惡名不可
得也請以可灼付東市論政府罪如律議上會魏忠賢竊
政悉反三案議以傾縉紳士貴遂謝病歸崇禎改元起本
官遣督餉還掌京畿道尋遷南大理寺丞以疾告家居十
餘載儉約自節推餘貲以振貧乏凡里黨無告者生資其

本江府志 卷之四十二 四十三
嫁娶死爲殮埋作廣孝阡葬無主喪及遺骼他若橋梁道路河渠寺觀苟有利于人莫不修舉郡人美之起應天府丞值淮南被寇流渡者多又歲饑餓殍盈路士貴立義倉置粥廠計口授餐全活甚衆遷南太常卿召爲刑部右侍郎次淮安疾作還至蘇州卒守臣以聞詔以所拜官贈之予祭葬錄其子鼎瑞爲國子生

張履端字旋吉華亭人兄拱端弟軌端萬曆壬子三人同舉于鄉郡人以爲盛事履端成丙辰進士授晉江知縣丁父艱服除補束鹿束鹿多惡少年結黨與馳駿馬白晝劫殺人輒馳去吏莫敢問履端至誅首惡其好勇喜事非真

盜者貰之使捕賊自贖由是境無胠篋先是滹沱河數決爲城患履端曰城直河衝其勢將歲圯安能日率父老以與河爭此土也城當徙乃閱義倉出積粟買芻藁木石兼餼就役者去河二十里作新城四百日而畢規制詳密民忘其遷秩滿當擢臺諫屬魏忠賢專橫羣小附之者得要職履端泊然無所營授兵部主事尙書王永光倚重之常使屬奏草永光有權數干時若微示異者會災變陳言切責去而忠賢疑疏出履端手奪其職履端慮禍及縱聲酒自晦崇禎改元召復故官病卒軌端字方同工文章風格嚴整署興化教諭遷邵陽知縣時楚賊勢張來犯境軌端

遣間使約苗洞長出兵赴急苗兵至大破賊于天王寺巡撫陳睿謨以聞得旨獎賚會軌端病卒邵人痛之軌端敦尚行誼伯仲旣歿撫羣從恩愛甚篤子姓多見稱于時王陞字超之華亭人萬曆丙辰進士授常山知縣調繁山陰丁父憂服闋補固安徵爲工部主事當董作三殿時魏忠賢擅政欲見之陞不往銓司闕廷議舉陞忠賢抑勿用改兵部職方司會天變尙書王永光疏請省刑薄歛陞所屬草也大忤忠賢意降旨切責永光引去將連及陞會陞以母喪去職忠賢亦尋敗得免崇禎改元服闋補本官庚午典山東鄉試還轉員外郎以武闈事罷尋召爲職方郎

丁丑分考會試論功擢太僕寺少卿陞爲郎十餘年籌策悉中機要疆場大吏條上便宜皆應時調度赴如影響常薦總理盧象昇威振陝雜流賊所畏宜使專督楚豫以靖內寇時不能用六合舊無城當寇訐淮泗巡撫張國維議設兵守之陞以爲兵部所省江南驛站銀具在宜請而城之使士著憑險爲守國維如其言遂城六合爲江表屏蔽其才識練達皆此類也建昌人鄒魁統上疏告變言孟河有蛇山僞王常至蘇州結社講學收納奸豪旦暮必反事下兵部陞覆奏言往歲長興葉朗生之變流傳海外有蛇山王本屬子虛今越十五年而魁統乃以入告何也請下

撫按覆勘勘果無左驗事乃寢武陵楊嗣昌爲尙書奪情起復言者皆獲罪陞面詰之曰公欲效李賢耶嗣昌默然自是頗相左在罔寺值薛國觀當國怨陞不附已再推山西湖廣巡撫皆不用遂謝病歸卒于家陞清亮自立言論有風采兄弟五人兄陞以明經爲訓導弟臺坊稔皆舉鄉薦友愛無間時人稱之孫日藻順治乙未進士由工部郎爲江西提學僉事又沂順治辛丑進士

杜喬林字君遷華亭人父若芳以儒行稱喬林成萬曆丙辰進士除刑部主事出知湖州府府枕太湖故多盜屬川酋亂山東妖寇起巨盜竹林圖王會王崑崙等遂竊發自

號蛇山王喬林與隣郡合力擒之而長興賊葉朗生等潛踞湖中出沒無定喬林陰使人四出偵伺密謀捕擊會其黨高登瀛自歸虛實盡得亟襲之朗生等就縛凡五十餘日羣盜悉平奏功當遷民譁曰府君活我奈何捨我去巡撫言于朝就加按察司副使知府事如故秩滿遷浙江水利道副使丁父憂服闋起福建屯鹽道轉右參政遷山西按察使浙江右布政使分巡溫處到官六日海寇劉香老入犯圍府城喬林募勇士韋古生等晝夜捍禦廉得賊謀湯家臣陳九皋誅之內應絕古生善發火器殺賊頗多乃出兵奮擊三戰皆捷賊乃焚其木城引去事聞再獲褒賜

以病告歸卒長子麟徵字仁趾少有英譽與太倉張溥等
齊名成崇禎辛未進士授刑部主事少從父宦遊曉習吏
事尚書使掌章奏時太監張彝憲等總理部事監宣大諸
鎮麟徵上疏極諫舉天啟近事爲戒舉朝歎服尋改兵部
職方司爲尚書熊明遇所重其請授諸將事權及定滇寇
普名聲麟徵條畫爲多又上書論時政得失有賈晁遺風
丁母憂歸卒年三十有九天下惜之所著浣花遺稿行于
世

陳所聞字無聲華亭人祖鉞好任俠島寇入犯率傭奴二
百人擊之頗有擒馘備兵使者任環欲官之辭不受獻其

良馬而去曰以報知己也父善謨慷慨好施訓子甚力所
聞成萬曆己未進士當試館職所聞曰不競之地可以自
處請急歸明年授刑部主事時內侍劉李輩以李選侍噉
鸞宮獄在繫士大夫扣扉往還無愧色諸郎見之必避席
遜語退則使人通殷勤其報謝亦不貲獨所聞視之如常
囚間日同舍郎邀飲欵曲屏人請曰某托致公幸假顏色
不敢忘報所聞艷然謬醉應以他語索馬歸明日上記尚
書言內犯驕肆不省愆交外人宜禁尚書弗善也未匝月
調工部主事董作明神宗陵奄人監護恣乾沒所聞故饒
心計凡工作所需材用皆與商平較而給直于昌平虛冒

無所容奄人憤思與爲難不得間而其黨有盜尙方陶磚作私廬爲所聞覺發且上奏奄懼委罪于從吏尙書爲之解乃榜其吏毀其室埽磚于庫羣奄奪氣八月玄宮成冬復治光宗陵所聞以陵近澗道寒凝土僵必不固工當俟春月尙書持不可所聞遭父喪解職其後積雨傾圯卒成大獄乃追思其先見焉所聞在官最有清望及奔訃號慕毀瘠家人幾不相識未幾疾作時南昌萬燦以糾奄人杖死所聞與燦同曹友善糾奄事實與共謀泣謂其子曰萬公當不獨死意恐有連也又聞奄人與爲難者入用事憂憤卒年僅四十

趙東曦字馭初右通政灼孫也萬曆己未進士除閩縣知縣閩地輸賦籍在收吏而納者無左券金粟入官吏或以意多寡之莫能辨也東曦始給印紙官民各執半契如吳下法奸詭遂絕丁父憂服闋補金華尋復丁母憂起補嵩縣居三月以前後政最徵拜刑科給事中時奄人王坤監鎮宣大巡撫沈際以失策逮坤奏乞放免候代東曦劾奏王坤職在監視厥罪維均乞正坤罪悉罷中使監鎮之任奏入降旨切責謫福建布政司都事稍遷行人司司正禮部郎中奉使還里以疾卒于家未幾明□宗以王坤治邊無狀追思東曦之直而不及用識者惜之子子瞻成順治

辛丑進士

張元玘字采初上海人天啟壬戌進士除刑部主事奉使齋餉寧夏所過餽遺及王國賜予皆辭不受遷員外郎轉郎中出知嚴州府調建寧府府衝劇郵傳疲困元玘事爲裁制立條約請臺使勒之石由是供億不擾又更釐政及錢法民皆便之告歸所著有廣史及雜著詩文數十卷孫錫懌成順治乙未進士官泰安州知州

顧國縉字寅美上海人萬曆丙午舉鄉薦授崑山教諭遷南國子監丞天啟季年操江都御史劉志選稱魏忠賢德齊至聖當建祠文廟左祭酒羅喻義不勝憤疽發背餘莫

能抗國縉奮爭曰誰敢爲先聖萬世罪人國縉誓以死守祠不可建志選恚馳使愬奄謂國縉本顧憲成族子中以黨禍會熹宗晏駕乃止遷南刑部郎出知常德府擢按察副使分巡桂林猺賊寇平樂諸郡縣國縉卽用猺人攻之擒其渠餘黨解散未幾楚寇來犯復以猺兵擊破之賊遁方論功以疾請老甲申聞賊陷京師北向慟哭不食卒

李逢申字延之長史伯璵五世孫也萬曆己未進士除慈谿知縣失闈黨意左遷縣佐丁母憂服闋起上林苑監丞升工部主事甫三月九上封事所劾兵部尙書梁廷棟誤國疏寢不報會軍興驗試火器廷棟以危法中逢申論戍

澈浦逢申長子雯痛父以數言貴人罹辜走京師訟冤章
上報罷後雯弟又伏闕上書政府亦爲之地事得白召逢
申爲刑部主事轉工部郎逢申又五上疏論時政有所彈
擊時寇已奄有秦晉逢申疏請結義旅以空名告身與廷
臣分募三輔山東兩河豪傑衛京師廷議中阻甲申三月
賊陷京師逢申被執不屈身受五毒自經死雯時從父在
邸舍已不食四五日聞難絮血行乞僅得棺朝夕捧壺漿
跪奠哭不絕聲又餓且病氣息奄然守父骨不復動及
朝廷破賊收京師內院諸大學士憐雯孝又奇其才薦授
內翰林弘文院撰文中書舍人丙戌得請干

朝以父喪歸葬事竣還朝卒雯以文章名世卽海內所稱
雲間李舒章也

莫天淳字還甫華亭人幼孤事母孝母有疾天淳刲右肱
肉以進母疾瘳而腕傷不任舉筆遂習左手書天啟辛酉
舉于鄉授涇縣教諭遷仙遊知縣縣南楓亭驛介漳泉間
地頗險奸民林纘元等聚衆謀不軌犯城邑督撫調兵千
人勦之天淳挺身爲士卒先夜馳往賊倉猝迎戰民聞縣
官出皆持挺競前奮擊大破之擒纘元焚其七寨餘衆潰
散閩南以寧滿考擢南刑部主事遘疾歿而上海王國材
亦以辛酉乙科爲黃巖知縣調繁臨海皆以廉平著會夏

早步禱雨雨降國材卽以是日卒民痛之建祠方山之陽
祀焉與天淳並稱循吏云

王鍾彥字粲伯副使明時孫也天啟丁卯舉于鄉猶講授
自給性至孝以母老乞署學職得長洲教諭入爲國子監
博士踰歲遷工部主事轉員外郎甲申春三月賊逼京師
鍾彥掌彰義門燈燎守將韓某開門納賊被執不屈死鍾
彥以孝友爲間黨所推清素自立不媿其祖人稱爲真老
廉盡節之日囊無一錢其友殮而殯之又八年始克葬
陳正中字宗尼上海人崇禎戊辰進士除上杭知縣縣介
虔粵流寇侵擾所在煽結正中至撫定凋瘵鳩集遺散調

兵食練鄉勇屢挫賊鋒獲渠帥張日昇降其支黨五百餘
人捕誅劇盜何相等三十餘人所部肅清革橋稅以惠商
旅積粟備荒歲饑不害流賊復犯武平正中恐滋蔓帥衆
持五日糧趨三百里擊之頗有斬獲賊望風引去隣邑以

元正中素有羸疾積勞轉篤竟卒于官在縣五載屬軍興
勇年大帥駐節會師供億繁重能盡心惠養民不知有兵
所積官穀七千餘石羨餘贖緩悉歸庫藏公私充實而妻
衣食不給卒之日民罷市哭巡撫鄒維璉上言正中撫

順討逆鞠躬盡瘁清白勵操遺愛在人請賜官崇祀
激勸救贈兵部主事追論平寇功再贈太僕寺少卿

崇祀鄒

